



割草

韶日又係拜六，歇睏日逐儕攏真歡喜。毋著，歡喜係阿依，艱難係佢人這陣細子。逐回个歇睏日，阿依早即想好頭路啊。上頭第三壟、第二壟个田塍草又長啊，這禮拜堵好愛去割割个。後禮拜日堵好愛去擲下裡田敏豆脣个草。擱後禮拜日，西片田个田塍草嘛差不多長啊，愛去割割。即按一禮拜擱一拜，一回擱一回个歇睏日，莫講出去奈，逐擺攏係割毋會盡个草。這即係佢做細子時，頭難添放个回憶。

到田个時，睭著長長長个田塍，即像遐萬里長城，連綿到天脣。特別係跔落去割草个時，感覺特別長。和兩個阿弟分好頭路，一個人負責一條田塍。跔落去个時，兩裡高高个禾，枷這陣細子么个身影做一下攏遮無去啊！這時正經有遐款「天蒼蒼野茫茫，風吹草低見牛羊」个感覺。這闊茫茫个平洋，一陣細子隱身在一大片个禾田慢慢子做佢人个事。

阿弟割草个腳手真緊，黏泥即割一大站去。佢割草雖然較慢，毋過較澈底。若得佢割過个所在，攏係寸草難留，割到斷點。阿依嘛不時交代，草愛割貼頭，正毋會「春風吹又生」。毋過照臺灣个天氣又熱又溼，毋使兩禮拜，草隨擱發到弓弓。割草作穡嘛像走馬拉松比賽，愛有擋頭。毋好起頭下從恁緊。到一半即軟腳去。像俗語講个：「頭興興，尾冷冷」按即做無頭路。做事愛像「捉魚撿魚頭，剷樹先剷根」共款愛有要領和耐心。

現時个田塍、菜園，作穡人討省工，毋係枷田塍硿紅泥，無即揜烏網，得田塍毋會發草。甚至噴草劑殺草。所以毋使像成過个人硬討逐日割草。毋過現時个人蹣在紅泥屋个森林內底，內心嘎顛倒真毋會安。若有一兜菜園抑係花園，心情無好、心肝亂个時，跔落去枷草擲擲割割，等整理好一片个時，即若像枷心肝底个雜草做一下擲莫，心情嘛做一下快活起來。佢嘛不時會擎鐮鐵抑係空手落田去擲草，這時務即會想起阿依講，割草愛割貼頭，做事毋好挑替，做人愛實實在在。

作者：李秉璋

☆詞彙學習☆

【田塍】teen` shin`：田埂。

【敏豆】min` teu`：四季豆。

【闊茫茫】kuad` mong` mong`：指非常寬闊。

【黏泥】neem` ni`：馬上。

【斷點】ton` deem`：將草割得一乾二淨。

【割貼頭】god` dab` teu`：除草須連根拔除。

【弓弓】hen` hen`：草長的非常茂盛。

【擋頭】dong` teu`：耐力，指工作的持續力。

【頭興興，尾冷冷】teu` hin` hin` mui` len` len`：剛開始興致勃勃，到最後興味索然。

【撿】ka：抓，此處指掐住魚的頭部。

【剷】pud`：用刀子或斧頭砍。

【硿紅泥】kong` fung` ni`：鋪設水泥。

【揜烏網】keb` bbu` miong`：蓋黑色網子，使不生雜草，即蓋防草塑膠農膜或雜草抑制蓆。

【草劑】coo` ze`：除草劑。

【鐮鐵】liam` teed`：鐮刀。

【挑替】teeu` te`：做事不夠確實，有一下沒一下的，疏漏百出。